



Greške bez odgovornosti

Almasa Hadžić Dnevni Avaz
February 11, 2007

Odlukom tobožnjih međunarodnih profesionalaca u policijskoj službi je ostavljen čitav ešalon počinitelaca ratnih zločina u proteklom ratu.

Evropska inicijativa za stabilnost (ESI) ovih dana je objavila izvještaj kojim upozorava da je međunarodna zajednica, u vremenu od 1999. pa do 2002. godine kršila ljudska prava u BiH, konkretno navodeći primjer 800 pripadnika policije koje su Ujedinjeni narodi proglasili nepodobnim za službu.

Piše u izvještaju (za ovu državu ništa novo), da su napravljene "mnoge greške" prilikom provjere i ocjenjivanja sposobnosti spomenutog broja policajaca, te da ni nakon što je to bilo očigledno UN i njihov IPTF, te OHR, nisu ni prstom mrdnuli da svoje greške isprave.

Izvještaj ESI-ja, logično, u BiH je doživljen kao ohrabrenje onim na čijim su se leđima slomile "greške" UN-ovih inkvizitora koji su u to vrijeme pisali, donosili i primjenjivali zakone ove zemlje, a za čije nelogičnosti i nepravdu nikad nikome nisu odgovarali.

Premda su bosanski propusti misije IPTF-a u slučaju decertificiranja 800 policajaca, u spomenutom izvještaju, okarakterisani kao "praksa koja se ne smije ponoviti", o čitavom nizu grešaka međunarodnih policajaca i njihovih šefova, zbog kojih ova zemlja godinama plaća visoku

cijenu, još se uglavnom šuti, a niko ni ne spominje nečiju odgovornost.

Odlukom tobožnjih međunarodnih profesionalaca, dok su iz službe izgonili mnoge časne policajce, u istoj je ostavljen čitav ešalon počinitelaca ratnih zločina u proteklom ratu i zaštitnika i pomagača mreže optuženih za ratne zločine. Certifikatima koje su potpisivali kojekakvi slučajni prolaznici sa plavim beretkama, a čija se naklonost, između ostalog, sticala uz rakijske kazane, ostavljeni kriminalci u policijskim uniformama u Bosni su odgojili cijelu generaciju automafijaša i trgovaca drogom kojima danas ni policija koja u većini slučajeva časno radi svoje poslove, ni sudije, ni tužioci ne mogu ništa.

Decertificirani policajci u BiH koji godinama dokazuju "grešku" međunarodne zajednice, najnovijim izvještajem ESI-ja dobili su moralnu zadovoljštinu. Kad će se dogoditi ona stvarna, zavisit će, ne samo od njihove izdržljivosti, već i od morala i hrabrosti bh. vlasti koja, ako je prava, mora pokrenuti sve svoje poluge kako bi im vratila njihova davno zgažena ljudska prava.